

302490

筆記小說大觀

蜀都碎事

清陳祥裔輯

第三冊



進步書局校印

天長地久



萬壽無疆
長生不老
平安如意

天長地久

萬壽無疆
長生不老

蜀都碎事藝文補遺上卷

清 陳祥裔耦漁輯

萬里橋賦

陸 肱

萬里兮蜀郡隋都。二橋兮地角天隅。相去而如乖舛。曾遊而只在寰區。倚檻多懷。結長悲而莫極。凭川試望。思遠道以何殊。昔者滄海朝宗。岷山發跡。斯觀理水之要。若啓鑿穴之役。逮夫東土為陽。西邦日益。駕長虹於兩地。客思迢迢。浩積水於千秋。江流脈脈。宇宙綿綿。今來邈然。結構應似。途程甚偏。將躋遊於楚岸。欲徑度於巴川。目斷波中。過巫峯之十二。心馳路半。到荆門而五千。徙觀夫偃蹇東流。崢嶸二邑。揭華表以相效。刻仙禽而對立。俄驚迴復。潮生而夕月初明。孰敢爭先。帆去而秋灘正急。眇天末之殊方。有人間兮異鄉。顧盼而層陰動色。徘徊而浮柱生光。飾丹腹以雖同。彼臨淮海。度軒車而既異。此對銅梁。古來幾許行人。曾遊此路。跨綠岸以長存。俯清流而下注。寧為駐足之所。莫問傷心之故。復有逆旅傷情。臨邛遠行。壯鬼製以靈轟。壓江流而砥平。家本江都。羨波濤而自返。身留蜀地。偶萍梗以堪驚。逶迤歸還。飄流恨結。之子去兮揚桂棹。長卿還兮建龍節。既風月以相間。固音塵之兩絕。斯橋也。

可以濟巨用之往來不可以攜手而相別。

鑿三江賦

狄遵度

嗚呼吾聞魚鳧氏以降。秦太守之前。蜀之為國。不幾千萬年。方三江之害被茲土。以禹之功。不是施兮。嗟後來亦奚言。彼民之昏溺兮。無乃得之於天。不能遷土而改宅兮。其流漂亦何究。勁崖挺以中亞兮。激狂瀾而右旋。橫驚折走莫知其所之兮。吼穹谷而下穿。蛟鼉鼉蟹訝以相濡兮。何允蠹而緣延。喙膚吮血涕以咀嚼兮。咸飲腐而飽臙。崔蒲菱芡紛以相被兮。汙百頃之良田。土不藝而民無所食兮。孰與奏其艱鮮。民之害固不可終極兮。歷百千萬世。天乃授之以賢。曰噫中國之無人。遂使民至於此焉。天之生斯民兮。故使之食飽而居安。降巨蓄以漂之兮。天之意不然。水之性固就下。善利兮。決之則宣。濬九川而距四海亦奚艱。且九載之孜孜。民不憚苦而訴煩。蓋因利而為利兮。勞之在先。不忍一勤其力兮。乃至驚萬世而害弗捐。胡不浚發其利源。剷削其害根。巨崖剖以鏤裂兮。若頽乾而陷坤。怒石奮以交墜兮。吁電走而雷奔。蕩重淵以傾覆兮。喪百怪之精魂。雲轉霧溢。盤薄蹙躑兮。注壑於其間。寂寥散漫。肆以長往兮。若氣散於垓渾。決其餘以旁溉兮。居其側數百頃。皆膏腴之上珍。民降

丘而下宅兮。若蟻聚而蜂屯。則幾年幾世之積害。一日刷去兮。不啻捐芥而蕩塵。嗚呼。蜀之為國。非地之中。宜乎彝貊之雜處。魚鼈之與同。有李侯者至。然後別類於水物。有仲翁者至。然後同俗於華風。然則今所棟宇而處。衣冠而嬉。皆二公之所翳。若李侯之事。固所莫得而繼。彼仲翁之教。亦何憚而弗為。嗚呼。以禹之功。至大至神。括六合以橫被。疇有存而勿論。胡茲為害。獨不得聞。無乃力所不涓兮。抑亦遺其功於後人。而今而後。乃知民未得所欲。事或有不利。先世所未暇除去。聖人所未及裁制。苟有志於生民。皆吾人之所事。若曰茲事體大。必聖人而後為。則小人也。不敢與知。

神女廟賦

晁公邁

漢武帝既封泰山之五年。臨朝而嘆曰。朕念元元之民。未蒙休德。周覽中土。以施惠澤。而南方以遠。故獨弗及也。朕甚憫焉。是冬詔發。攸飛羽林之士。簡車騎之眾。盛清道之儀。天子御雕玉之輿。服龍文而駕魚目。擊蒲稍而驂躡雲。至於盛唐。望九疑。登天柱。薄樅陽而出。休於瑯琊。天子大悅。作盛唐樅陽之詩。命協律都尉延年歌之。以觴群臣。酒未半。天子戚然不懌。時東方朔枚舉侍。因進曰。陛下不懌。臣敢請罪。帝曰。朕適望瑯琊之上。忽然雲興。其氣甚異。因感高唐之事。聞楚陽臺之山。下有神女。旦

為朝雲。暮為行雨。朕心慕之。異時諸方士嘗言仙者非求人主。人主求之。乃可致。今
往遊天下。冀一睹列仙之屬。而莫獲焉。殆朕之德不如楚王。能有所遇也。是以不憚。
朔跪曰。楚王諸侯耳。有臣宋玉。善為微詞。感動神女。見夢於王。臣嘗笑之。玉安知神
女。若臣者。乃知之上意。乃解命謁者。給朔札。使為之賦。朔即獻詞曰。徑西方之綿邈。
兮。積閭風之崇基。繚玉壙以千里兮。右翠水而左瑤池。崑崙層峙以崖峩兮。弱淵周
流而逶迤。中龜臺之清都兮。嵒洪敞而甚治。紫丹房與石室兮。罍浮雲而上齊。諒豐
隆月缺之矜工兮。斧雷霆而斲之。疏懸黎以代礎兮。瑩結綠而飾墀。虞淵倒影而下
射兮。光反激以交馳。萃飛仙之遊遨兮。餌若英而咀瓊枝。憂叢霄之靈遠兮。歌白雲
而忘歸。狀愉樂而不可憚兮。非羽輪其莫窺。帝九靈之少女兮。其名曰瑤姬。受素書
於紫清兮。含洞陰之華滋。習玉瑛而厭處兮。乘回飈以長辭。狂章大騁為之奉轡兮。
策蒼虬而駕白蜺。馭八景之玉轄兮。曳紛綸之雲旗。載靈氣而輕舉兮。揭鸞戾而鴻
飛。涉巨溟之層波兮。將攝乎南箕。聆夢澤之雄爽兮。潏天水之相圍。介清丘而瀟漫
兮。奄高唐以冥迷。忽意樂而延佇兮。彌絳節以徘徊。出丹笈授夫神禹兮。靖九土而
安柔祇。下民懷斯遺烈兮。即石化而為祠。象瓊光之華闕兮。騫辛癸以為楣。矯藻棟

以乘虬兮。烈葯房而張薜帷。羣峯連卷而十二兮。爛雲屏而揚輝。儼玉立而正中兮。貌渥飾而具宜。沐蘭澤而含若芳兮。被桂裳而繡衣。炯黼黻之豐麗兮。淡聯娟之修眉。肅容華之拱侍兮。紛環珮之陸離。神武蹲而抱闕兮。夕夾陛以文狸。猿猱悲吟以度曲兮。女媧倚歌而舞馮彝。三足鳥往來為之使兮。訊東華之靈妃。迹逍遙乎中區兮。亮素節之靡移。鼻祖祝融之裔子兮。竊息媯以荆尸。蠱文夫人於前兮。後又奪耶陽子之妻。豹舄斃掩而據內兮。遽月暴罕而蒙訾。黑要挾夏而與居兮。於菟盜邛而遂孽。世非淫而上蒸兮。嘗見刺於湘纍。橫下臣繫宋玉兮。按暴厲之不可規。稱先生常與靈游兮。薦枕席而嬖私。今胡為而復遇兮。意託諷於微詞。啓後世之警惑兮。詎魄化而為芝。曰媚而服焉兮。則與夢期。宜聖覽之孔昭兮。獨超悟於昨非。厲皇荒德而慢神兮。禍源起乎龍床。悼衛蒯之失國兮。艾假實發其亂機。屏宓妃而却玉女兮。幸後王之三思。

灩澦堆賦

薛紱

蜀江匯而赴峽。勢迫抑而騰掀。掌江之衝。有堆屹然。爰停我橈。徘徊覽觀。有會余心。乃知大禹所以浚川而不去此者。匪特以殺水之怒。而四瀆之長江。有灩澦河存砥。

柱則聖人之意亦將有所寓焉。夫形而上者謂之道。形而下者謂之器。器者物之物。道者物之先。先乎物者在人。則存乎心者也。所以宰制乎萬物。豈一物所得而肩。彼堆斯江。彼柱斯河。在物之石而器之下也。然洪水滔天。不為之移。狂濤卷空。不為之動。潦盡漲涸。岌乎峭壁。亘宇宙而長存。閱陵谷之變遷。而人之所以先乎物者。乃誘於知。乃遂於物理之趨如水斯下。欲之熾於火斯然。曾莫得以止遏者。反茲石之。不若又安可以推其原縱而忘反。茲固弗道制之無方。愈蕩而偏。禁而絕之者。昧乎倫類。空而妙之者。荒無逕躔。嗚呼。無廬而居。無畔而田。卒窮露而奚歸。寧耕獲而有年。曷不觀於茲堆乎。彼惟居其所者。屹而固也。然後可以障狂瀆之流川。苟失其所而昧其居。吾知此心之不傳。其居伊何。曰則自天。理雖微而難明。實天命之固然。自視聽言動之間。以及於君臣父子之懿。物必有則。理不可違。切而思之。講而明之。習而察之。謝無根之潢潦。挹有本之源泉。眇乎其微。深乎其困。物有萬變。事有萬理。察乎其微者。卓然而不可易。然後可以蔽乎天地而關乎聖賢。必真知也。而後其行也。果必力行也。而後其知也。全。恭敬朝夕。奉以周旋。茲孔孟之所以不倦。不愠。不忤者。豈蹈白刃之勇者。所得而言。嗚呼。人心之危。匪石。而人欲之勝。甚於水。吾觀茲堆而有感。

於天則之嚴是以憂講學之急而述之於篇

巴國考

王象之

山海經云西南有巴國。又云昔太皞生咸鳥咸鳥生乘釐乘釐生后昭是為巴人。郭璞注云巴之始祖事。案字記周武王伐紂巴蜀之屬鬻微預焉。尚書牧誓云及庸蜀羌鬻微盧彭濮人。注云鬻微在巴蜀巴之名已見於此。巴志云武王克殷封其宗姬於巴爵之以子。春秋魯桓公九年巴子請與鄧為好。莊公十八年伐楚。文公十六年巴與秦楚共滅庸。哀公十八年巴人伐楚敗於鄆。又曰庸蠻叛楚楚莊王伐之。七遇皆北。唯儵魚人實逐之。杜曰裨儵魚三巴。今魚腹縣也。巴志云戰國時蜀既稱王巴亦稱王。巴志亦云周慎靚王五年蜀王伐苴侯奔巴。巴為求救於秦。秦惠王遣張儀司馬錯救苴巴。遂伐蜀滅之。儀貪巴道之富因取巴。執巴王以歸置巴蜀及漢中郡。

蜀國考

前人

按世本山海經揚雄蜀王本紀華陽國志諸書皆言蜀之先肇於人皇之際至黃帝子意娶蜀山氏女生帝嚳後封其支庶於蜀。歷夏商周始稱王者。總目名蠶叢次曰柏灌次曰魚鳧其後有王曰杜宇。杜宇稱帝號望帝時有荊人黿令死其屍隨水上。

荆人求之不得。鼈令至汶川下。忽復生。見望帝。帝立以為相。時巫山壅江。蜀地洪水。望帝使鼈令鑿山。蜀得陸處。望帝因禪位於鼈令。號開明。遂自亡去。化為鵲鳥。故蜀人謂子鵲為望帝。自開明而上至蠶叢。凡四千歲。自開明而下至五葉。有開明尚始立宗廟。尚書牧誓所謂庸蜀者。即此也。通鑑。慎靚王五年。巴蜀相攻擊。俱告急於秦。秦使張儀司馬錯伐蜀。滅之。貶蜀王。更號為侯。後以其地為蜀郡。華陽國志云。開明氏。凡王蜀十二世。

蜀山考

前人

金陵隨筆云。蜀人繪蜀山作六圖。一曰峨眉。去嘉州峨眉縣百里。為六山之最。自白水寺登山。初二十里。有石磴可登。又二十里。多無路。以木為梯。行三二里。方著實地。又二十里。有雷洞。始到光相寺。則峨眉絕頂其上。樹木禽鳥。多與平地異。天氣尤不同。九月初。已下雪。應綿衣絮衾。用盡而終夜然。火山上。水煮飯不熟。飯食皆從白水寺造。上所謂光相錦雲天燈陰雪不見。一曰青城山中。有六道宮。丈人觀。上清宮。為最。五宮觀皆在山之麓。五里。至上清。又至成都山。則為半山。至大面山。則為山之巔。大面山後。即老人村。不可通矣。一曰錦屏。今閬州城南。五山峙立。江南如屏。有浙間

山。亦有讀書巖。乃陳亮兄弟讀書之地也。一曰赤甲。曰鹽。在夔門。絕頂之兩岸。水流

山衆有讀書巖。乃陳堯叟兄弟讀書之地。一曰赤甲白鹽。在夔門灩澦之兩岸。水流其中。而兩山束之。大率如蜀之門戶。一曰劍門關。古所謂劍關之險。有大劍小劍之號。往往山皆北向。有劍鋒之狀。而道出兩山之間。有關使以司之。一曰巫山。今夔州巫山縣之東。十二峯不是一面生。江遠此山周遭十二峯。故人繪為一圖爾。

蜀水考

前人

四瀆惟江最大。發於岷。逕夔。荆達揚而入於海。此江之源也。外自蜀而言。江之外其水有七。出於綿之神泉。曰綿水。出於什邡之章洛山。曰洛水。分流於永康之湔壩。曰湔水。綿水自綿竹紫巖山逕德陽。雒水自什邡入雒。湔水逕導江。崇寧九隴。蒙陽亦入雒。三水皆合於雒。自雒逕懷安。簡資富順至瀘。與江水會。總曰內水。發源於江油之清川。逕綿。潼遂東。至於合。曰涪水。發源於沔之青泥嶺。逕大安。利闕果至合於涪。水會曰嘉陵水。發源於小巴嶺。逕巴蓬之伏虞。西南以至於渠口。巴水出萬頃池。逕明通。又至渠。與巴水合。曰渠水。巴渠二水既合。逕廣安。新明至合於嘉陵。涪水會以達於渝。而江始大。此七水與江別合之大畧也。若分流出彝中入中國以附於江者。有三。曰青衣。曰羊山。曰馬湖。青衣出來山。逕嚴道。洪雅夾江而下。羊山出鐵豹嶺。逕

漢源至嘉定之南。與青衣水合。入於馬湖。自夔都流至敘。亦入於江。又有出於郡邑之山澤者。則自岷峨而下。沿流以至於夔。不勝其眾。其大者如盛山之萬頃池。則醴流有四。一入於渠。三入於夔。惟漢水出嶓冢。與江分流。由漢金趙襄至江夏大別山。始與江合。此蜀眾水接連荆楚源流之大畧也。

劍閣銘

晉張載

巖巖梁山。積石戕戕。遠屬荆山。近綴岷嶓。南通邛樊。北達褒斜。狹過彭碣。高踰嵩華。惟蜀之門。作固作鎮。是曰劍閣。壁立千仞。窮地之險。極路之峻。世濁則逆。道清斯順。閉由往漢。開自有晉。秦得百二。并吞諸侯。齊得十二。田生獻籌。矧茲狹隘。土之外區。一人荷戟。萬夫趑趄。形勝之地。匪親勿居。昔在武侯。中流而喜。山河之固。見屈吳起。興實在德。險亦難恃。洞庭孟門。二國不祀。自古迄今。天命不易。憑阻作昏。鮮不敗績。公孫述既沒。李氏勢銜。壁覆車之軌。無或重跡。勒銘山阿。敢告梁益。

月巖銘

冉木震

黔號古郡。地居極邊。倅治倚山。其山刺天。曰有月巖。古老相傳。視事累月。徧求茫然。偶濬溝渠。巨石中填。深掘視之。厥狀巔岼。中實一穴。透明而圓。皎如秋月。翳絕浮烟。

旁輔三隙。如星之聯。枚括細觀。古識存焉。爰命僕夫。昇置座前。負以層石。映以灣泉。日對其側。卷舒簡編。凡物遭遇。皆有貴緣。高岸深谷。知幾變遷。惟我月巖。存千萬年。

卜肆銘

陸龜蒙

蜀莊之託著龜也。以忠孝仁義。後來之託著龜也。以媮佞險諛。美之使怡愉。怛之使駭畏。小人惟惡是嗜。松江本作視惟禍是避。惟福是覲。惟瞽言一字集作聲是媚。曾不究得失之所自。故幽贊之著。前列之龜。乃此為庸妄之器。嗚呼成都。吾不知古為市之地。况君平之卜肆耶。強為之銘。具刻其意。

石室銘

宋石仁

昔夏禹定九州。貢法明三壤。同異山川。草木鳥獸。戎夏土地所生。財賦所出。聲教所暨。咸悉載之。無一遺者。至於天下人性賢愚。民心善惡之所係。則闕而不載焉。三代而下。史策所存者。咸能著之圖籍。而志其地理。迹其記錄。則於天下人氏所係之性。亦畧而無聞焉。聖賢之述作。亦有所闕乎。豈聖賢之志。將有所蘊乎。意者謂人性之上下不常。於世隨其教化而移易也。故上之教行。則民興善。上之令嚴。則民興暴。皆從其上之所為耳。語曰。如風之偃草。又曰。若泥之在鈞者。豈虛言哉。此聖賢所以不

可不筆之而傳後世者矣。且蜀之開國地遠中夏民性怯懦而多浮侈。迨文翁之為守。立學校。造講堂。石室以備其制度。遺後又之士。東受七經。還以教授。於是風教大行。而岷絡之地。比於齊魯。厥後相如既沒。而淵雲之徒。森然繼出。兩漢之際。舉不乏賢。得人之稱。迨今攸盛。於戲。蜀始以僻陋險隘。人民夸詡。古謂難治。暨文翁以儒學教導之。則其人莘莘然嚮慕於文學。而見用於當世者。得非上之教化移易於人民若是哉。覽之前記。尤美其事。觀乎遺迹。則石室猶存。雖前賢有銘其徽烈者。大率言立學興儒。而以石室琬琢。取學者磨礱之意。又欲樹功於不朽也。觀其言詞。似猶未盡賢守教化之深意。因復廣而銘之。曰。地有常形。民無常性。繇上之化。所從而正。惟蜀之郡。在天一隅。俗尚浮侈。人希服儒。賢哉文翁。來牧茲土。爰立石室。始興庠序。俾此泯絡。儒風大行。予以兩漢英賢踵生。降及我朝。得人侔右。家慕淵雲。學隆鄒魯。政教下格。文材上通。迨今蜀人咏歌德風。

移建離堆山伏龍觀

并序

馮 沅

夏書禹貢。導江漬以出岷山。秦史河渠。鑿離堆以洩沫水。懷襄昏墊之瀾。平之於前。以陂九澤。以通百貢。於是乎錫圭鑄鼎。夏后以膺圖立極。瀦如頊洞之患。濬之於後。以

疏二江以灌萬井。於是乎閘牛沉岸。李公以興利除害。大惠決於黎獻。豐功遺於億萬。其極一也。與夫鄭國分渠於渭上。西門引漳於河朔。思較其博。倍將萬矣。左史曰。指渠口以為雲門。洒漉池而為陸澤。不其然乎。非夫有道之士。其孰能勇斯身。仁斯民。輝照竹帛。豐潔祠享。如此其光也。詳夫驅風雲。運神化。剪妖厲。謀疏鑿。功廕萬世。壽踰百歲。其在神仙之品。得非漢天師。許旌陽之徒歟。離堆山。伏龍觀者。風俗傳云。誅邪壓怪之所。腴田沃野之會。驚湍湧雷。激瀨飛雪。洪流滉其淡澹。迴波潏乎溶溶。爾其雲壁高圻。霜濤中注。靈阜嶙峋。以磅礴。冲淵澎湃。而澆濤。礧礧灘潏。靖振林谷。有若長蛟。斷於陽羨。支祈鑠於淮泗。勿復害矣。每歲孟春。役徒萬億。記太倉為之給粟。長吏為之督工。築之繩之。決之防之。乘時以興。比月而息。枝分脈散。環縈紆錯。連州越郡。膏沐千里。雖密雲震霽。愆陽蘊隆。而田原是濡。倉箱是粒。書不云乎。岷嶓既蒨。沱潛既導。蓋坤離之上游。天府之陸海也。爰建福地。聿崇仙館。旌哲人之餘烈。慰生民之報德。固其宜矣。伉常覽舊史。燦然神迹。式將王命。躬率偃功。歷載惟三字。九芟草以廣其趾。積石以增其注。遷舊宇之翳薈。即孤山之顯敞。洪流壁轉。列峯屏合。東臨江口之關。故靈基立其左。崇功之義也。西瞻寶室之穴。故仙亭峙其右。思道之

旨也。正居太上之殿。中築朝真之壇。喬木蔽乎陽岑。缺二激乎陰壑。石頭虎踞之狀。

蓬丘鼇冠之奇。呂梁縣仞之險。吳濤逆奔之勢。羅列在目。殆非人世之景。缺五嘯於

谷風。鉉鶴鳴於浦月。白雲生座。上拂仙香。彩霧依巖。下傳天樂。缺二聖上凝命穹昊。

躋人福壽。訪道以清中夏。軒轅氏之理也。望秩以徧羣神。有虞氏之勤也。茲地也。名

山周映。靈跡孤標。僉移集道之宮。尊為逆釐之府。事非改作。功無用勞。不革舊名。惟

崇新宇。經構輪奐之狀。助楊穆清之化。真風奇跡。等天地久。不亦盛乎。不亦永乎。拂

石刻銘於彼山趾。其詞曰。李公英英。日貫其誠。其功美利。於今有靈。仙鳧屹峙。元都

景明。壇殿新製。門闥舊名。江沱泚泚。楊漣玉清。岷山峩峩。回峯雪零。桂菌朝蔚。漪瀾

夜渟。來雲嘯歌。浮丘赤城。

禹廟記

王廷瞻

帝王世紀及路史。華陽元和志。揚子雲蜀記。並載帝禹汶山廣柔人也。生於石紐。蓋
今之石泉縣云。然則蜀於禹為發祥。詩姜嫄所當生民之初。若後世號稱湯沐邑者。
宜有祀。考之宋。嘗祀禹於石泉。又嘗祀於夔門。計有功張侖為記其事。而今皆湮沒
矣。嘻。何其闕也。今上踐祚。修舉廢闕。興於禮樂。靡德不報。百物咸周。於是中丞巴陵

羅公直指隴西郭公。咨覽禹跡。慨然遐思。言於朝。請為禹廟。成都如秦州祠太昊之義。以颺禹績。稱皇上卷卷平成之意。制曰可。建治祠城中。越三載而告成。殿廡奕奕。門屏翼翼。丹雘有奭。肅肅藹藹。欵若降涉。嗚呼盛哉。夏后明德之遠。而聖主之事報斤斤休咎矣。余讀書至禹乘四載。同九州作貢。十有三載。過門不入。蓋喟然嘆息于禹烈焉。然其辭雅馴。畧言之。及讀他傳記。所載禹治水躬操耒耜。燒不及損。濡不拾。花冠挂屐。脫而弗顧。所又名川三百。支流三千。至於腓亡。肢支不遂。竅息不屬。以奠民於安土。所謂臣役之勞。不穀於此者也。至他稱述戴鈐履已。受策河精。如乘龍宛委。童律成光。無支祈之類。則又詭與非常聞。余甚異焉。然書亦稱洛出書。錫禹九疇。此與所稱探符授簡者異乎哉。今越之會稽山。其上蓋有禹穴焉。意者天授神聖。以拯九州之溺。而貽萬世之安。事宜有之。如圮橋素書。穀城黃石。不必盡誣也。世稱神禹有以也夫。不然。何其獨擅神明之號也。夫以禹之勞。如彼。其功若此。宜祀一尊。邁迹則廣柔為降神之鄉。宜祀二。沂峻業則岷嶓為滌原之首。宜祀三。今河濟淮泗之間。沿流裸獻。而民間又往往家尸而戶祝之。而茲土顧無祀。豈以沱潛既道。蔡蒙既旅。數千年無壅決昏墊之患。忘其功而遂忘其報乎。嘻。何其負而不德也。夫祭之為義。